

事物紀原集類卷第五

凡六部共一百九十六事

鄉貢進士闕敬校正

三省綱轄部第二十二 凡四十八事

侍中

環濟要略曰古官也風后為黃帝侍中周有常伯見尚書立  
政秦漢為侍中徐堅初學記曰秦取古官置本丞相史也丞  
相使史五人來往殿中奏事故謂之侍中後魏始為樞密之  
任梁又以為宰相職事唐侍中與中書尚書二令並為真宰  
相矣

門下

門下侍郎秦官秦有黃門侍郎歷代不改與侍中俱管門下  
衆事凡禁門黃闥故号黃門其官給事于黃闥內故云唐天



寶元年改曰門下唐百官志云二年也

散騎

秦置散騎又置中常侍本二官魏文帝黃初初合散騎常侍為一官唐顯慶中分左右左隸門下右中書也

給事

秦置通典曰加官也初秦漢別有給事黃門之職後漢有給事黃門侍郎左右給事中以有事殿中故曰給事中獻帝時去給事黃門侍郎後周有給事中士別置給事在中在六官外隋初開皇六年始于吏部置給事郎煬帝移為門下職唐武德三年改給事郎為給事中

夕拜

漢給事中故事每日暮時入對青瑣門拜故謂之夕拜亦為

夕郎

諫議

秦置諫大夫後漢光武增為諫議大夫歷代不改唐龍朔中屬中書開元後歸門下正元四年五月分左右以右隸中書二起居

周有左右史王言則左史書之動則右史書之蓋起居之本也漢武有禁中起居後漢馬后自撰明帝起居注則其事似在宮中古女史之職也此始有起居之名魏晉以降著作掌之後魏有置起居令史別置修起居注隋煬帝置起居舍人唐正觀二年于門下省置起居郎顯慶中復于中書置起居舍人以郎為左史以舍人為右史

諫正

唐武后垂拱中置拾遺補闕掌諷諫中宗以來有左右開元  
時左屬門下右中書會要云垂拱元年二月二十九日也宋  
朝會要曰雍熙五年二月詔改補闕為左右司諫拾遺為左  
右正言蓋太宗欲令諫官修其職業故改其官號也然則禮  
地官之屬有司諫則周已名官矣唐書朱滔傳建中三年滔  
僭稱王後二年聘張遂金道為司諫則滔又以此名立官也  
中書令

舜納言周內史皆中書之任也漢武游宴後庭始宦者典事  
尚書謂之中書謁者置令不言謁者省文也通典云唐百官  
志則曰秦始皇置中書謁者漢元帝去謁者字漢魏品卑而任  
重隋文帝廢三公府寮令中書令與侍中知政事遂有為宰  
相職林以謂漢成帝建始四年改中書謁者令曰中謁者令

以士人為之魏文帝黃初初改秘書令為中書令也  
中書侍郎

漢武帝置中書領尚書事有令丞郎魏黃初初置通事郎後  
改曰中書侍郎唐志曰晉初置通事郎後  
中書舍人

初學記曰魏世中書始置通事一人明帝時有通事劉泰是  
也高貴鄉公改曰通事都尉尋為通事侍郎晉初置舍人通  
事各一人東晉各為一職梁始掌詔詰其後除通事直曰中  
書舍人舍人本屬官掌平宮中之政  
尚書令

三代冢宰之職也秦漢置尚書令于百官無所不主漢武元  
鼎二年始以張安世為之初學記曰秦官也漢因之

僕射

秦官史記始皇本紀有僕射周青臣是也古者重武以善射者掌事故曰僕射僕射者僕役于射也一云僕主也古有主射以督課漢因秦事自侍中謁者博士御史丞丞伯尚書皆有其成帝建始元年初置尚書五人一人爲僕射以蓋其始也獻帝建安四年以邵榮爲左僕射衛臻爲右僕射置左右之始也

左右丞

秦置尚書丞一人漢成帝建始四年置四人光武始減其二分左右佐令僕之事唐以來在尚書之下宋朝官制改陞在上又爲執政官

六尚書

尚書秦官志少府遺吏四人在殿中主發書故謂之尚書劉向新序曰齊宣王爲大室香居諫王召尚書尚書之名則七國時已有其官矣晉志曰漢光武始分尚書爲六曹通典曰漢初尚書雖有曹名不以爲號及靈帝以梁鵠爲選部尚書于是始見曹名漢百官表曰成帝建始四年始置尚書四人續事始云尚主也出納王命敷奏萬機政令所由宣選舉所由定罪賞所由正李固曰尚書猶天之北斗斟酌元炁運平四時

分行

唐會要曰武德令吏禮兵民刑工正觀即吏禮民兵刑工光宅元年九月五日改爲六官準周禮通典曰周禮天官冢宰掌邦六典以佐王理邦國漢成置四尚書因事設負非擬于

古光武分六曹稍以周禮唐武后遂以吏部為天官戶部為地官禮部為春官兵部為夏官刑部為秋官工部為冬官以承六官之制國初以吏兵戶刑工禮為次神宗行官制復唐故事又以吏戶禮兵刑工為次也

子司

又曰故事以兵吏及左右司為前行刑戶為中行工禮為後行每行各管四司以本行為頭司餘為子司自唐制始也

二十四司

自秦始置尚書而歷郎曹多寡不等少或十二亦至三十六隋有天下尚書有六曹二十四司即今都省列曹是也其制自隋始也

子司印

唐會要卷之九十四尚書省除吏部兵部外共用都司印至開元曆一年一月九日初備文昌臺二十四司印本司郎官主之八座

後漢以六曹尚書并令僕為八座梁齊亦有稱隋唐至今令僕為宰相故六尚書及左右丞為八座蓋其事自漢東京始也

六侍郎

漢制尚書郎三歲稱侍郎隋煬帝即位于尚書六曹各置侍郎一人按漢百官表有侍郎秩比四百石也

郎中

漢制尚書郎初上稱守郎中晉武帝始置諸曹郎中唐以來號正郎武德三年尚書郎改為郎中按秦有郎中令臣瓚以

爲主郎內諸官則郎中秦官也

負外

隋開皇三年尚書二十四司各置負外郎一人以司其曹帳籍則郎置負外自隋文帝始也按漢書惠帝即位賜爵外郎滿六歲一級則隋置負外郎亦取漢事云亦常述唐兩京記曰晉宋以來始置負外郎

左右司

隋煬帝即位尚書都司初置左右司郎一人副左右丞唐又置負外郎諸司號爲都公唐書百官志云天后永昌元年置左右司負外郎各一人也

吏部

漢初曰常侍曹後漢爲選部魏始曰吏部按周官司馬之屬

有士司爲下大夫通典則以爲吏部之始疑出于此也

司封

左傳晉文公爲執秩以正其官杜預云謂主爵秩之官蓋今司封職也漢尚書有封爵之任後漢馮勤是也北齊有主爵職林曰唐龍朔二年改爲司封通典以爲光宅元年

司勳

周禮夏官司馬之屬有司勳掌賞地之法後周始置其官于尚書省通典云後周吏部有司勳上士

考功

漢京房作考課之法而其職不在尚書光武改尚書三公曹主歲考課至此始爲尚書職魏初置考功亦唐虞考績之事也而周禮亦有考功記云

戶部

周禮地官之掌也漢置尚書四人一主財帛委輸即今戶部任矣其始有戶部名通典曰吳孫休即位戶部尚書讀奏是也周禮司民掌登萬民之數即戶部任也

度支

通典曰漢世於廷筭以列侯主計領郡國上計者始今度支之任也魏文帝始置度支尚書唐以爲子司

金部

周官職金掌錢石丹青之令則金部之職也魏世始置尚書金部郎

倉部

周官倉人主蒞九穀庫人主其數調賜精食則倉部之職也

禮部

魏時尚書始置倉部郎

唐虞秩宗周官宗伯皆今禮部之任也後周有禮部不言職事隋以典儀曹其名命自宇文周始也

祠部

魏代始于尚書置祠部曹蓋其官自魏始也歷代因之不改

主客

漢成帝初置尚書客曹光武分置南北客主于此遂以名曹膳部

膳部

即周官膳夫也晉有左右士曹北齊曰膳部

兵部

周禮夏官司馬之職也魏有五兵尚書晉宋爲七兵後周始

曰兵部

職方

周官有職方氏掌天下九州之圖隋初有職方侍郎通典曰後周依周官有職方也

駕部

周官與司馬校人牧師中車之職皆駕部之事也魏晉之代尚書始置駕部郎

庫部

周官司甲掌戈盾弓矢則今庫部也魏尚書始有庫部郎也

刑部

唐虞之士周禮司寇皆刑部之任也光武謂之賊曹為尚書職後周始有刑部大夫則刑部自宇文周始也

都官

漢司隸屬有都官從事掌中都官不法事此名官之初也光武改成帝二千石曹掌中都官水火盜賊魏青龍二年始置尚書都官郎佐督軍事

比部

魏尚書有比部曹通典曰北齊比部掌檢勾事唐天寶十一年改掌諸司公廨公私欠負及勾用度物也

司門

周禮有司門通典曰後周依周官有司門隋初為司門侍郎煬帝除侍字也

工部

唐虞共工在周禮為冬官之職漢置民曹光武改主繕修工



作池苑魏為左民晉尚書為起部郎後周始曰工部也  
屯田

漢昭帝始置屯田而成帝置尚書郎一人主戶口墾田此蓋  
尚書屯田之始也魏代為農部晉始有屯田尚書則屯田名  
曹在晉世也

虞部

舜命益作虞周禮有虞衡之官蓋虞部設官之本魏始置虞  
曹郎後周改曰虞部

水部

周禮夏官有司險掌溝塗蓋水部之職也魏尚書始有水部  
郎

持憲儲闈部第二十三 凡三十事

御史大夫

周禮春官宗伯之屬有御史掌贊書戰國時秦趙會澠池各  
命御史書鼓瑟擊缶之事淳于髡謂齊王曰御史在前則上  
世皆為記事之官也秦漢以來始糾察風憲然則御史蓋周  
官也秦置御史大夫以為御史之率故曰大夫  
中丞

獨坐

漢初御史大夫有兩丞一曰御史丞一曰中丞初學記曰秦  
官漢因之謂之中丞以其別在殿中掌蘭臺秘書外督部刺  
史內領侍御史故云成哀間更名御史長史光武復曰中丞  
後漢宣秉傳曰光武建武元年秉拜御史中丞特詔與司隸  
校尉尚書令並專席而坐故京師號曰三獨坐今中丞亦循

其制始自漢東京迄今為故事也

侍御

周為柱下史秦時張蒼為御史主柱下方書是也亦為侍御史是則侍御之官始于柱下也漢始有侍御史又有繡衣侍御史蓋自武帝置也後漢亦有之隋直曰侍御史漢書朝議以范丹為侍御史是也韓朗以侍御史與三府掾治楚獄是也

端公

唐侍御史之職有四謂推彈公辭事臺內之事悉至之號為臺端他人稱之曰端公其語自唐始也

南床

唐制御史故事食坐之南設橫榻謂之南床殿中監察不

得坐也唯侍御坐焉凡侍御例不出累月而遷南省者故號為南床今猶有是循唐故事也

殿中

魏蘭臺遣御史居殿中察非法即殿中侍御史之始也

監察

初秦以御史監理諸郡謂之監察御史蓋監察名官之始也隋文帝開皇三年始曰監察御史宋朝會要曰太平興國三年以張巽為監察御史先是三院多外任風憲之職用他官領之遂詔正名舉職自此始也宋朝之制凡職事官皆他官領之惟三院御史自是始正其名也

裏行

唐太宗初置此官自馬周始也初馬周以布衣任事詔令于

監察御史裏行遂以名官舊唐書志云正觀初也龍朔元年八月以王本立爲監察裏行唐會要以謂裏行之名始于此非也六典亦云始于馬周宋朝行官制始省之續事始曰太宗時疑未以名官自高宗始以命官云

### 三院

唐憲府故事侍御殿中監察呼三院故今亦斥殿中曰殿院監察曰察院自唐室始也

### 六察

唐百官志曰監察御史分察尚書省六司興元元年一人察吏禮部一人察兵工部一人察戶刑部歲終議殿取元和中以新人不出使無以觀能否乃命專察尚書省號六察唐會要云元和四年五月御史臺奏舊例監察御史從下第六人

各察尚書省一司是也宋朝會要曰國家每入閭國忌臨時差六察吏察兵察戶察刑察禮察工察元豐中神宗始置六察司于御史臺

### 知雜

唐武后以來呼侍御曰端公侍御之職四自雜侍臺侍懋愬判之故知雜事者曰雜端後又有以郎中員外兼侍御而知雜事者亦呼雜端官制行省之

### 左右巡

唐會要曰正元十年四月勅準六典殿中侍御史分知左右巡察其不法之事按六典自明皇時作則左右巡之置亦其時事也通典曰殿中侍御史自開元初知左右巡百僚班序有雜立失言頑而不肅者則以禮罰之是則此制自開元始

也李肇國史補曰玄宗開元初至天寶末年置御史左右巡使也

### 臺簿

漢有此官張忠爲御史大夫署孫寶爲主簿是也疑漢官云  
宋朝會要曰淳化四年六月始置二人後止一員也

### 檢法

唐置御史臺推直官而無檢法宋朝元豐中神宗正官制除推直始置檢法之官

### 六傳

夏商雖世嗣而太子之名亦略矣其師傅之官亦無文至周始見文王世子故禮之所記班班僅可推攷文王世子曰凡三王教世子立太傅少傅以養之太傅在後入則有保出則

有師則太傅之原槩舉于此矣武王又稱太子也漢止有太傅少傅至晉有天下愍懷建官乃置太子太師太傅太保洎三少爲六傳也漢費詡上疏云保保其身躰傳傳其德義師道之教訓此三公之職也又于是爲置三少皆選天下之端士故太子聞正言行正道習與正人居不能無正則六傳之說似漢有之然諸傳無其說亦可疑焉

### 賓客

漢高祖欲易太子呂后用留侯計迎四皓以定太子故賓客之名始起于此孝文爲太子立思賢苑以招賓客孝武爲太子立博望苑使通賓客洎晉愍懷建宮惠帝使衛庭司馬略等五人更徃來備賓友雖非官而謂之東宮賓客唐顯慶元年正月以于志寧等爲太子賓客遂以名官定置四人蓋取

法于四皓

詹事

秦官掌太子家歷代因之通典曰東宮官序秦漢加置詹事庶子及諸府率官也應劭曰詹省也給也漢官儀曰秦官實嬰景帝即位為詹事孔霸宣帝時為太子詹事

庶子

禮記燕義曰古者周天子之官有庶子周禮夏官司馬之屬謂之諸子秦置中庶子詹事負漢因之晉以為東宮官晉書鄭默為中庶子朝官以為太子官是也隋分左右通典曰品官命數為漢有太子庶子魏有太子中庶子則非晉以為東宮官也

少詹

如于詹事府置少詹事一人以貳詹事

論德

唐龍朔三年初置太子左右論德蓋取文王世子教之以事而論諸德之義

太子侍讀

漢宣帝詔王褒等皆之太子宮娛侍太子朝夕誦讀此蓋其始也宗有諸王侍讀唐正觀中許叔牙為王侍讀高宗升春宮仍兼侍讀職林云開成元年十一月宰相李石奏置太子諸王侍讀

太子侍講

後漢張酺以尚書講論授皇太子其事始見于此魏官品始有太子侍講此置官之始也

中舍人

晉咸寧中初置太子中舍人官宋朝神宗又置之唐以來有太子中舍而無中舍人

舍人

秦官唐龍朔二年改為太子右司議郎咸亨元年復為太子舍人宋朝初亦不置神宗正官制復置之

翊善

宋朝王府之官多省不置別置翊善曰某王府翊善蓋古王傳之任而輕其名位也宋朝會要曰太平興國中始置也又云八年三月以戴元為衛王府閭象為廣平王府楊可法等為皇太子翊善蓋自此始也

王侍讀

開元初十王宅引辭學工書者入教亦為侍讀

皇朝省王府餘官而別置侍講一員

記室

魏置太相以陳琳阮瑀為記室掾其官始見于魏武之世矣宋用晉制自明帝後皇子弟雖非都督亦置記室參軍則記室而為參軍晉官也宋朝亦置于諸王府曰某王府記室也

官教

宋朝會要曰至道元年以孫贛充皇姪皇孫教授從新號也時中書言唐文宗朝李石奏太子有侍讀諸王亦有無隆殺今皇姪皇孫官是環衛請以教授為名此蓋王宮教授設官

之初也

九寺卿少部第二十四凡三十九事

九卿

禮記曰夏后氏百官始置九卿漢九卿俱不以卿名官梁武  
天監七年始加卿字

少卿

後魏官氏志云大和十五年初置少卿以卿為大卿

太常

亦周禮春官職也秦有奉常漢初改曰太常蓋秦官也初學  
記曰高祖改漢百官表曰景帝中六年更

太常丞

秦置官漢為太常亦曰太常丞

太常

漢有太常疑漢官也

太常博士

魏官也魏文帝初置之顏師古注漢書曰太常王者旌旗畫  
日月大事則建以行禮官主奉持之故曰奉常後改曰太常  
尊大之義也

協律郎

漢武帝置律協都尉以李延年始為之晉改為校尉後魏曰  
協律郎蓋漢武以延年善新聲故特為置協律

奉禮郎

漢大鴻臚有治禮郎蓋設官之始也按通典歷代皆為治禮  
郎唐初亦有掌設板位執儀行事奉徽二年以諱改為奉禮

杜佑云奉禮本名治禮國家撰五代史志至永徽七年乃成于時此官已改故北齊及隋治禮皆爲奉禮奉禮之名雖見于史其改始自永徽

太祝

商官六太其一曰太祝在周禮爲禮官宗伯之屬掌六祝之詞秦漢有丞隋除令丞止存太祝

齋郎

魏始有太常齋郎唐有太廟郊社之別唐洎國家其久次者太廟又補室長郊社即補掌坐掌次謂之黃衣選人祖宗以來又以爲朝臣子弟起家之官

郊社令

梁始有太社令後周爲司社上士隋于太常寺置郊社署故

爲郊社令宋朝避英宗嫌名改曰局

藉田令

周爲甸師漢文帝初立藉田乃置令也

太醫令

周禮天官冢宰之屬有醫師上上下下士掌醫之政令聚毒藥以供醫事秦爲太醫令丞漢因之

宗正

周官也在周禮實小宗伯之職宋百官春秋曰周封兄弟之國十有五同姓之國三十有五選其宗中之長而董正之謂之宗正秦因其說置宗正兩漢皆授皇族不雜姓晉始兼庶姓也舊唐志曰星經有宗正在帝座東南漢高紀七年二月置宗正官以序九族



宗正寺丞

漢置官亦用公族

宗正簿

梁置官也

宗正司

林希兩朝寶訓曰景祐三年仁宗謂輔臣曰宗室子孫衆多聚居必以尊賢者糾合之詔置大宗正司擇祖宗後各一人命之首以濮安懿王與守節任其事後又有同姓庶官知丞事神宗時乃參用同姓

光祿

漢書曰秦郎中令掌宮殿掖門武帝太初元年更名光祿勳通典云梁除勳字曰光祿卿續事始曰秦掌宮殿門戶郊祀

三諸郎將在殿中侍衛北齊兼掌膳隋全掌諸教膳不掌宮殿

光祿丞簿

皆漢所置應劭曰光明也祿爵也

太官令

周官膳夫庖人外饗皆其任也秦置太官令屬少府漢不改晉屬光祿後魏分太官為尚食知御膳太官掌百官之饌

衛尉

秦官也掌宮門衛屯兵之職尉尉也古兵獄之官皆以尉言所以尉羅姦邪也

衛尉丞簿

皆秦漢所置也

太僕

周禮夏官司馬之屬有太僕下大夫尚書冏命穆王命伯冏為周太僕正則太僕周官也應劭曰蓋大卿衆僕之長

太僕寺丞

秦漢有此官也

太僕簿

梁始于太僕置主簿

大理

齊職儀曰古官也管子曰黃帝得后土辨于四方使爲李春秋元命包曰堯爲天子得皋陶爲大理舜時爲士官韓詩外傳有平文公使李離爲大理春秋左氏傳衛侯與元咺訟士榮爲大理新序楚昭王石奢爲理則大理之名自志有秦

爲廷尉漢景帝中元中更名大理蓋漢復古號也舊唐書志曰取天官貴人之字曰大理之義即周禮士師之職孟詵錦帶前書載三代法官之名則曰士夏曰大理也

大理寺丞

晉武帝咸寧中曹志請廷尉置丞北齊曰大理也

大理簿

通典所載自魏晉以來歷代皆有之是疑魏置官也

大理正

秦置廷尉正禮記曰獄成告于職之正注云正周禮鄉師之屬則秦之置官亦法周也其名亦隋改云

司直

後魏永安二年御史中尉高穆奏置大理司直漢武初置司

直之官屬丞相府謂之丞相司直疑大理之置司直亦取漢丞相司直爲名尔淮南子曰湯有司直之人許慎注云司直官名詩鄭風曰邦之司直然則漢之命官亦法古尔

評事  
漢宣帝地節三年初置廷尉左右評魏晉無左右直曰評隋煬帝始曰評事

鴻臚

周官大行人也平實曰亦周禮象齊之職漢書曰秦爲典客掌諸侯四方歸義蠻夷漢改曰大鴻臚徐堅云漢改之漢百官表曰太初元年更也梁除大字應劭曰鴻聲臚傳之也傳聲贊道也劉熙曰馮大也臚陳也欲大以禮序陳賓客也馮鑑續事始曰楚云連敖漢爲典屬國按漢世典屬國自爲一

職非鴻臚之任也

鴻臚簿

唐因陳隋之舊有鴻臚主簿一人

鴻臚寺丞

秦典丞也其名蓋隋所改

司農

少昊九農正也舜爲后稷秦爲治粟內史漢景更爲大農令武帝太初元年改曰大司農魏文帝黃初中止曰司農

司農寺丞

秦治粟丞也漢置丞十三人爲勸農官後改司農亦曰司農丞

司農簿

晉太康中始置司農主簿

太府

周禮天官冢宰之屬有太府下大夫梁武帝天監七年始置太府卿續事始則云梁天監中置少府卿後魏大和中改太府丞簿

周禮太府上士即丞職也下士即簿職也梁置太府卿則丞簿二官亦梁置也續事始曰魏也

秘殿掌貳部第二十五凡二十大事

秘書監

漢桓帝延熹二年始置秘書監一人

秘書少監

隋煬帝始置秘書少監一人

秘書丞

齊職儀曰漢獻帝置秘書令丞二人魏文帝分秘書別掌文籍自置丞一人此蓋置官之始也或曰魏武帝置也

秘書郎

通典曰後漢馬融爲秘書郎當是其官自漢置也職林曰魏官也初漢置秘書郎蓋中書之任魏分秘書掌文籍爲秘書郎中宋除中字

校書郎

又曰西漢蘭臺後漢東觀皆藏書之室當時文士讎校于中故有校書之職而未爲官後以郎居其任故謂之校書郎元魏始命以爲官續事始曰續漢書云成帝置以傳教馬融爲校書郎掌審定讎校圖書

正字

漢桓初置秘書監掌圖書古今文字考合同異今正字之官蓋其遺意也齊集書省有正書官北齊始為正字

著作郎

漢東京使名儒碩學入直東觀撰述國史謂之著作以他官領之未以為官也魏明帝太和中始置著作郎晉元康二年又謂之大著作

著作佐郎

魏氏又置佐著作郎宋齊已來遷佐于下曰著作佐郎

太史令

少昊鳳鳥氏為歷正夏后曰太史周禮為春官宗伯之屬秦為太史令唐乾元元年改曰司天監宋朝仲宗正官名復為

太史令

太史正

唐長安二年置太史令二人開元以後以令為監改令一員為少監國家亦曰司天監少監官制改除少監置太史正

太史丞

司馬彪續漢書曰太史有丞一人歷代同之疑漢官也

直長

後漢有太史史隋城門衛府殿內皆有直長而太史無之宋朝正官神宗始置太史直長

五官正

通典曰唐乾元元年改太史局為司天置五官正謂春夏秋冬中五官也

靈臺郎

唐改太史為司天監掌天文歷數風雲氣色具小史有靈臺郎時乾元元年也

保章正

周禮春官宗伯之屬有保章氏掌天文以志星辰日月之變動辨其吉凶此蓋其官之始也唐乾元元年改監其小史有保章正則是唐改周官保章氏為正也

挈壺正

又夏官司馬之屬有挈壺氏掌挈壺以令軍井然則亦周置官也唐乾元元年始改太史為司天其小史有靈臺郎保章正也

殿中監

殿中少監

隋煬帝大業中初置殿內少監唐復殿中之名亦曰殿中少監

殿中丞

此官蓋與少監同隋大業三年所置也其名改易同少監云奉御

北齊門下省初置典御之官隋改曰奉御以隸殿中省

尚食

如淳曰掌天子之物曰尚秦置六尚乃有尚食則尚食秦官也

尚藥

梁陳以來皆爲太醫兼職亦秦所置六尚之一也

尚醞

唐已前有尚乘無尚醞皇宋朝元豐中官制行則置此官也

尚衣

周有司服爲禮官之屬戰國始有尚衣尚冠之職北齊制主衣隋復曰尚衣也左氏曰昔虞閼父爲周陶正注云陶復陶也陶正主君上之衣服此尚衣之始也

尚舍

周禮天官有掌舍凡舍事則掌之漢官有守官舍于魏則殿中職也隋煬帝別置殿內監改舊殿中局曰尚舍

尚輦

周官有中車秦漢爲車府令隋煬帝初置殿內省置尚輦也

五監總率部第二十二 凡二十二事

國子祭酒

孫卿在齊爲三老稱祭酒漢吳王濞爲劉氏祭酒又漢博士內聰明有威重者一人爲博士祭酒胡廣曰凡官名祭酒皆一位之元長古者得主人饌則老者一人舉酒以祭地故以祭酒爲稱晉咸寧中初立國子學始置國子祭酒六帖曰堯典克明俊德以親九族九族既睦平章百姓周封兄弟同姓成王時彤伯爲祭酒主親屬秦漢目之又曰高祖七年自櫟陽從長安置祭酒官續漢書有祭酒一人掌錄叙工國嫡庶及宗親遠近郡國歲所上宗室名通典云

國子司業

隋煬帝大業三年始于國子監置司業官取禮記樂正司業

之義

國子監丞

亦隋官置與司業之官同置也

國子主簿

北齊初置國子主簿

國子博士

班固云六國時往往有博士漢多至數十人晉武初立國子學始置國子博士之官漢百官表曰博士秦官通古今

太學博士

通典曰漢武建元五年初置五經博士按趙歧孟子題辭云漢興孝文欲廣游學之路論語孝經孟子爾雅皆置博士後罷傳記博士獨立五經而已此今太學博士之職也晉江左

國子博士六人始謂之太學博士品服同國博神宗元  
制行改舊直講之官復置太學博士職如經博士也

博士

神宗熙寧中即武成王廟建武學置教授如國子監直  
講官制行亦改為武學博士

律學博士

晉初置律學博士屬廷尉衛尉親置請律學博士輔相教授  
唐移屬國子監唐志曰武德初也

太學正錄

禮朝仁宗時胡瑗掌太學其正錄第補諸生以為學校職掌  
然不以命有官者神宗熙寧末興三舍始勅授命官亦為學  
官之例



少府監

秦置少府漢以來為九卿後魏孝文太和中易官品改少府曰太府隋煬帝大業五年又分太府監蓋少府之名本起于秦而為監自隋始也秦掌山海池澤之稅其屬官有尚方典工作事今少府所職乃漢尚方之事云

少府少監

隋始以少府為監又置少監以貳監事

少府監丞

漢所置官

少府主簿

晉初置之

將作監

少昊五雉為五工正與唐虞之共工周官考工之所記也將作之任也秦始置將作少府漢景帝更為大匠隋開皇中改將作寺曰監故大匠之名亦更為監

隋開皇二十年改將作大匠為大監初加置副監煬帝大業五年改曰少監

將作監丞

漢置將作丞隋改監亦曰監丞

將作主簿

晉將作置主簿負

軍器監

後周武帝初置軍器監則其官自宇文周始也

宋本改此三行  
十一字

軍器少監

唐開元三年始于軍器監置少監及丞簿

都水使者

舜命益作虞蓋掌山澤之官周禮地官司徒之屬川衡澤虞即都水之任也秦始有都水長丞漢武元鼎二年初置水衡都尉又以都水官多復置左右使者此蓋設官之始也晉武省水衡置都水使者自此官名乃定

都水監丞

秦有都水丞漢又有水衡丞蓋武帝置水衡即置之也晉除水衡有都水丞亦先秦之舊云

都水主簿

晉初于水衡有其官後隨府改也

環衛中貴部第二十七凡三十一事

上將軍

史記曰義帝以宋義為上將軍漢以呂祿為上將軍魏黃初中有上大將軍唐正元二年九月諸衛上將軍也老子曰君子用兵則貴右是以偏將軍處左上將軍處右說苑田忌奔楚王問齊楚相并柰何對曰齊使申孺將則楚發五萬人使上將軍將之則是春秋逮戰國始有上將軍之官也

大將軍

戰國時始有大將軍之號隨事即置亦不主官劉劭爵制以謂秦十八爵大庶長即大將軍也左右庶長即左右偏裨將軍也楚懷王與秦戰秦虜其大將軍屈平是也項羽時范增稱大將軍漢遂置大將軍開府如三公至煬帝于諸衛悉置

將軍

周禮天子六軍軍萬二千五百人其將皆命卿蓋在國稱大夫在軍稱將軍自晉獻公作二軍而公將上軍故將軍之名特出于此左傳闕沒汝寬偕謂魏獻子為將軍後漢百官志云初漢武將軍始自秦晉以為卿號七國皆有其事漢以來其命官之名極多謂之雜號也

諸衛

左傳楚潘崇掌環列之尹謂宮衛之官列兵而環王宮漢京師有南北軍掌理禁衛武帝初置衛將軍此名衛之始也秦有衛尉掌門衛則衛亦先秦之舊制亦晉武重兵官選清重之士置中軍以統諸宿衛此諸衛之始也

金吾衛

秦有中尉漢武帝太初元年更名執金吾蓋取執金革以禦非常也周隋為武侯之職唐龍朔二年改左右金吾采古名也

左右衛

漢有衛將軍魏末晉文王又置中衛武帝受禪分中衛為左右衛會要云唐武德元年因隋舊制有左右翊衛五年去翊字但曰左右衛矣

驍衛

漢有驍衛將軍謂之雜號武帝始以李廣為之梁武帝天監六年分左右

武衛

後漢末曹公為丞相有分營魏武帝置武衛將軍隋始分左右

右續事始曰魏許褚從太祖破馬超遷武衛中郎將武衛之號自褚始也

屯衛

隋初爲領軍府煬帝改爲左右屯衛唐爲威衛五代周太祖時避名復曰屯衛也六帖曰漢宣帝即位初置屯衛

領軍衛

魏武爲漢丞相府自置領軍非漢官也建安十二年改中領軍文帝受禪始置領軍將軍晉武初有左右

監門衛

舊唐志曰漢魏曰丞門校尉隋初有監門府將軍唐龍朔二年改府爲衛

千牛衛

宋謝綽拾遺千牛刀人主防身刀也義取莊子庖丁解割千牛而刀刃若新發矧之義故後魏有千牛備身掌執御刀唐顯慶五年始置左右千牛府龍朔二年改府曰衛

諸率

自秦漢始有諸率以爲東宮禁衛晉始置五率歷代因革不常遂分左右也

府率

秦官也晉武建東宮始置率此其始也

副率

隋制諸率府各置副率掌貳率事

衛率

秦置衛率府後漢主門衛晉武太始五年分左右

司禦率

隋文帝制左右宗衛其官如左右衛煬帝改曰率唐龍朔二年改爲左右司禦衛後復曰率

清道率

隋文帝置左右虞候各置開府一人唐龍朔二年改爲清道衛開元初爲率府

監門率

隋有左右監門率掌門禁唐志曰武德五年改左右宮門率也

內率

隋置左右率掌禁內侍衛唐爲左右內率舊唐志曰隋初置左右內率府擬上臺千牛衛也

南班

筆談曰宗子授南班官世傳王曾爲相日始開此議不然也故事宗子無遷官法唯遇稀曠大慶則遷一官景祐中初定祖宗並配南郊宗子緣大禮乞推恩自此遂有南班之授近屬自初除小將軍七遷爲節度使遂爲定制熙寧元豐間袒免之外例授小使臣同庶官也

內常侍

秦置中常侍官參用士人給事殿省隋避諱改內常侍內給事

周禮內小臣之職也後魏有中給事中後爲中給事煬帝改曰內丞直唐曰內給事神龍元年内侍省屬有內給事八人是也宋朝不置臨事或攝

都知

宋朝會要曰國初有內中高品都知押班今置部都知副部知並在景德三年五月云尔然則其官自國家始也

押班

國初有內中高品班院有押班後隨省改易其名號宋朝會要曰初押班無他職或加檢校官淳化後始以崇班以上充此押班之始也

內供奉

宋朝會要曰雍熙三年置入內供奉官大中祥符二年二月宣入內內侍省供奉官改為入內內侍省內東西頭供奉官內侍省供奉官亦同此例

殿頭

又曰太平興國八年始有入內殿頭高品大中祥符三年二月宣入內內侍省殿頭高品為內侍殿頭

高品

宋朝太宗興國八年又置高品至真宗祥符二年始為內侍高品云

高班

又曰雍熙三年置入內高班內品大中祥符二年二月宣改高班內品曰高班

黃門

漢明帝永平中始置小黃門宋朝會要曰國初黃門初補止曰小黃門經恩遷即為黃門黃門蓋漢官也歷代有黃門侍郎今門下侍郎是也

内品

宋朝會要曰雍熙三年置入内高班内品祥符二年改定有  
祇候高班内品祇候内品小内品雲韶部内品小内品入内  
内品掌門内品後苑内品散内品等神宗正官止存内品之  
名餘皆省也

事物紀原集類卷第五

